



VERKORTE Gedragskode vir leerders

Algemene reëls

- Leerders sal hulle te alle tye as goeie ambassadeurs van die skool en ooreenkomstig die etiekkode van die skool gedra.
- Terwyl leerders die skool verteenwoordig, hetsy direk of indirek, hetsy as deelnemers, ondersteuners, helpers, toeskouers of andersins, sal hulle hulself van enige gedrag weerhou wat die skool, personeel of hul medeleerders in 'n slegte lig kan stel.
- In hul wisselwerking met die skoolhoof, departementshoofde en opvoeders en ander skoolpersoneel, moet leerders te alle tye die nodige hoflikheid en respek betoon en hulle weerhou van optrede wat op oneerbiedigheid of opstandigheid neerkom.
- In hul wisselwerking met mekaar, moet leerders sover moontlik selfbeheersing aan die dag lê en wedersydse respek en verdraagsaamheid betoon. In die besonder moet leerders hulle weerhou van enige gedrag wat daarop gemik is om die fisiese, geestelike en morele welstand van enige ander leerder te skend, of wat daartoe kan aanleiding gee. Enige seksuele of onbehoorlike fisiese kontak tussen leerders op die skoolterrein of enige ander plek waar hulle as leerders van die skool uitgeken kan word, is streng verbode.
- 'n Opvoeder van die skool sal oor dieselfde regte as 'n ouer beskik wat betref die beheer en dissipline van die leerder volgens die gedragskode, sowel gedurende die leerder se skoolbywoning asook gedurende enige skoolaktiwiteit.
- Leerders sal op die bestemde tyd aan die begin van die skooldag en met die aanvang van enige ander skoolaktiwiteit opdaag. Wanneer leerders laat kom, moet hulle 'n skriftelike verskoning van hul ouers verskaf.
- Leerders mag nie in die klaskamer of saal eet of drink nie. Die kou van kougom gedurende skoolaktiwiteite is verbode.
- Leerders sal te alle tye 'n netjiese voorkoms handhaaf deur te hou by die reëls en voorskrifte vir skooldrag, hare en juwele soos uiteengesit in die volledige gedragskode vir leerders.
- Leerders sal gasvryheid wys deur alle personeel en besoekers vriendelik te groet en nuwe leerders hartlik te ontvang en deel van skoolaktiwiteite te maak.
- Leerders sal samewerking gee in die klasse sodat elke leerder ongehinderd kan leer en werk.
- Leerders moet hulle met die afneem van toetse of eksamens van enige vorm van oneerlikheid weerhou.
- Leerders sal volle aandag in die klas gee en pouses gebruik om te ontspan, te eet en die kleedkamers te gebruik. Kleedkamers moet deurgans netjies gehou word, sodat almal dit kan gebruik.
- Selfoongebruik gedurende skoolaktiwiteite is streng verbode. Oproepe mag slegs in noodgevalle en met die toestemming van die skoolhoof gemaak word. Die bring van selfone na die skool word nie aangemoedig nie. Indien dit egter nodig is, moet die

selfoon gedurende skoolure afgeskakel wees en in die leerder se rugsak/skooltas wees. Indien 'n selfoon in onderrig-ure of gedurende pouse sonder vooraf toestemming gebruik word, sal die onderwyser die selfoon inneem en by die Skoolhoof inhandig. Die ouer kan dit persoonlik na twee skooldae weer by die kantoor kom uitteken. Leerders sal 100 debietpunte ontvang vir hierdie tipe oortreding en die daaropvolgende strafklas vanaf 13:45-17:00 moet bywoon.

- Die rook, besit en/of gebruik van tabakmiddels, nikotienbevattende middels, e-sigarette, drank, ander alkoholiese middels of dwelmmiddels gedurende enige skoolaktiwiteit, is verbode.
- Leerders sal die skool se eiendom respekteer deur dit op te pas en nie rommel te strooi op die skool-en sportgronde nie.
- Leerders word nie toegelaat om enige motorvoertuie of motorfietse na die skoolterrein te bring nie.
- In geval van 'n redelike vermoede dat leerders hulself aan 'n oortreding van hierdie gedragskode of die landswette skuldig gemaak het, het die skoolhoof of 'n opvoeder die reg om sodanige leerders en/of die eiendom in hul besit vir enige gevaarlike wapens, gewere, dwelms of ander skadelike en gevaarlike middels, gesteelde goedere of pornografiese materiaal te deursoek wat die leerders moontlik op die skoolterrein kon bring. Sodanige leerders se menswaardigheid sal deurentyd gerespekteer word, en dus sal die deursoeking privaat, deur persone van dieselfde geslag, en in die teenwoordigheid van nóg 'n persoon geskied. Die deursoekingsproses en -uitkoms moet opgeteken word.
- Enige optrede wat die administrasie, dissipline of doeltreffendheid van die skool onbillik benadeel, sal as 'n oortreding van hierdie gedragskode beskou word.
- Skuldigbevinding deur 'n hof aan 'n strafregtelike oortreding sal as 'n oortreding van hierdie gedragskode beskou word.
- Oortredings wat tot skorsing en/of uitsetting kan lei, sluit in, maar is nie beperk nie tot:
 - optrede wat ander se veiligheid bedreig en wat die regte van ander skend;
 - die besit, dreigement of gebruik van gevaarlike wapens;
 - die besit, gebruik, verhandeling of sigbare bewys van narkotiese of ongemagtigde dwelms, alkohol en bedwelmente middels van enige aard;
 - bakleiery, aanranding of mishandeling;
 - onsedelike gedrag of 'n gevloek;
 - die aanneem of voorhou van 'n vals identiteit;
 - enige vorm van haatspraak, seksisme, rassisme of ander antisosiale gedrag;
 - diefstal of die besit van gesteelde goedere, wat die diefstal of besit van toets- of eksamenvraestelle voor sodanige toets of eksamen insluit;
 - onregmatige optrede teenoor en/of vandalisme, die vernietiging of beskadiging van skool eiendom wat die aanbring van graffiti sou insluit;
 - oneerbiedigheid, aanstootlike gedrag en verbale mishandeling gerig teen opvoeders of ander skoolpersoneel of -leerders;
 - herhaalde oortredings van skoolreëls of hierdie gedragskode;
 - strafregtelike en onderdrukkende gedrag, soos verkragting en geslagsgebaseerde teistering;
 - viktimisasie, afknouery en intimidasie van ander leerders;
 - die oortreding van eksamenreëls; en

- opsetlike en bewuste verstrekking van vals inligting, of die vervalsing van dokumente, ten einde onbehoorlike voordeel te bekom.

Ek onderwerp my aan enige dissiplinêre maatreëls indien ek sou versuim om enige beplalings of maatreël in die skool se gedragskode na te kom.

Geteken te _____ op hierdie _____ dag van _____ 20 _____.

HANDTEKENING VAN LEERDER: _____

HANDTEKENING VAN OUER/VOOG: _____

Die volledige gedragskode is beskikbaar in Hamakom Privaatskool se kantoor.